

## **Oproep tot lof**

Ons is hier in God se naam  
Daarom is Hy by ons  
Dat Hy kan lewe in ons loflied  
Nooi ek jou nou tot aanbidding  
Kom ons bring lof aan Hom

Omdat U ons Vader is  
Groot in almag bo die skepping  
En vir u eindelose liefde  
Uit ons harte Hemelvader  
Bring ons nou lof aan U

Ons bely U is ons God  
Ons kniel nederig voor u voete  
Lê ons lewens op die altaar  
Net soos U vir ons kom leer het  
Bring ons so lof aan U

Ons is hier in God se naam  
En ons glo U is hier by ons  
Kom dan en lewe in ons loflied  
Neem ons offer van aanbidding  
Ons bring al ons lof aan U

Bring alleen net lof aan U

## **God van die skepping**

God van die skepping - Ons Koning en Heer  
God wat vir ewig oor alles regeer  
Alfa - Omega verhewe in krag  
U is ons Vader vol liefde en mag

Woord van die Vader - Ons Redder en Hoop  
Groot en magtige Krygsman wat vooraan bly loop  
Immanuel met ons - Ons Kruisofferlam  
Jesus die Christus - Leeu uit Judastam

Hulp van ons Vader - o Heilige Gees  
U wat ons leer om gehoorsaam te wees  
U gee ons leiding en hulp onverdiend  
U is ons Trooster - ons Voorspraak - ons Vriend

Voor God drie-enig juig ons as U bruid  
U lei en leer ons - U stap voor ons uit  
Gebede soos wierook styg op na U troon  
Louter genade dat U in ons woon

Vader en Seun en Heilige Gees  
Hy wat ons Koning vir ewig sal wees  
Liefde uit Liefde het na ons toe gekom  
En ons bring in liefde weer lof terug aan Hom  
Uit dankbaarheid bring ons weer lof net aan Hom

## Jesus van Patmos

Tussen sewe goue kandelare  
Staan die God-Seun Hemelvors  
Sy kleed was lank tot aan sy voete  
'n Band van goud was oor sy bors  
    Jesus Christus - Ons Immanuel  
    Hy wat aan die kruis moes ly  
    Bring verlossing vir jou en my

Sy hare soos wol - Soos sneeu in sonskyn  
Sy oë het soos vuur gevlam  
Sy voete brons gloeiend in die smeltoond  
Soos water dreun die stem van die Lam  
    Jesus Christus - Hemelkoning  
    Hy wat op die wit perd ry  
    Bring oorwinning vir jou en my

In sy hand die sewe sterre  
Uit sy mond die twee-kant-lem  
Sy voorkoms soos die son se strale  
Vol liefde hoor ons weer sy stem  
    Wees nie bang nie - Ek's eerste en laaste  
    Ek was regtig dood maar kyk  
    Ek lewe tot in ewigheid

Ek hou die sleutels van die doderyk  
In sonde was jy dood maar kyk  
Jy sal lewe tot in ewigheid  
Saam - met - my - lewe - tot - in - ewigheid

## **Maak ons in U een**

Aan U Abba Vader - Alle lof en eer  
Bron van lewe - Bron van liefde  
Tot in ewigheid ons Heer

Vader ons aanbid U  
en ons loof u Seun  
Kom o Gees en vul ons harte  
Maak ons in U een

Jesus ons Verlosser  
Oorwin die dood en hel  
Lam geslag – ons Kruishout-offer  
Ons Immanuel

Heilige Gees ons Trooster  
U wat leer en lei  
Rig ons lewens, maak gehoorsaam  
Verhoog so Jesus hier in my

Vader ons aanbid U  
en ons loof u Seun  
Kom o Gees en vul ons harte  
Maak ons in U een

Maak ons in U een

## Jesaja 6

Die hoogste troon  
Met glans omhul  
Waar God se kleed  
Die tempel vul

Serafs besing  
Sy majesteit  
Heilig is Sy  
teenwoordigheid

Die drumpels dreun  
En rook verskyn  
Ek het God gesien  
Ek is onrein

Met skuld versoen  
Deur altaarvuur  
Staan ek voor U  
Dat U my kan stuur

## Die liefde

Al ken ek die taal van die engele  
Maar ek praat sonder liefde in my  
Klink ek net soos die klank van simbale  
Sal my gawes als nutteloos bly  
    Die liefde is geduldig en vriendelik  
    Dit bedek, hoop, verdra en dit glo  
    Sonder kwaad en verheug oor die waarheid  
    Die liefde bly ewig lank so

Al het ek die gawe van lering  
Al sou ek geheime kon ken  
En al skuif my geloof ook die berge  
Sonder liefde sou ek niks daaruit wen

In my kleintyd was alles so anders  
Ek het gedink en gepraat soos 'n kind  
Maar nou dat ek groot en 'n man is  
Het ek waarheid in liefde gevind

Nou kyk ons deur 'n spieël in 'n raaisel  
En sien net 'n vae dowwe beeld  
Nou verstaan ons maar net 'n klein deeltjie  
Maar eendag sien ons als onverdeeld  
    Nou bly geloof, hoop en liefde  
    Drie dinge wat altyd sal bly  
    Maar die grootste van als is die liefde  
    Die liefde van my Vader vir my

## Heilig is ons God

Heilig - Heilig

Die engele roep : Heilig

Heilig is die Een op die troon

Sterke God en Vors van vrede

aan U ons dankgebede

Heilig Heilig Heilig is ons God

Waardig - Waardig

U alleen is waardig

Waardig is die Naam bo elke naam

Waardig en bo als verhewe

U is die bron van alle lewe

Waardig Waardig Waardig is ons God

Heilig - Heilig

U kinders roep ook : Heilig

Heilig is die Een hier in ons hart

U goedheid Here - Abba Vader

U liefde trek ons altyd nader

Heilig Heilig Heilig is ons God

En die vier lewende wesens naby die troon

het elkeen ses vlerke gehad

wat aan die bokant en aan die onderkant vol oë was

Hulle het sonder ophou dag en nag gesê :

Heilig Heilig Heilig is die Here God

die Almagtige wat was en wat is en wat kom !

## **Pelgrimslied**

O ek kyk na my berge-pad  
En wonder waar ek hulp sal kry  
My hulp kom van die Here  
Die Skepper van die heelal

Ja Hy sal sorg dat jy nie struikel nie  
Hy sluimer en Hy slaap nooit nie  
Hy's naby jou in doodsgevaar  
Beskermer van Israel

Sou son of maan jou leed wou doen  
Jou lewe sal Hy trou bewaar  
Oral waar jy ookal heen mag gaan  
Vir nou en vir ewig

Ek kyk op en sien my berge-pad  
En ek weet waar ek hulp sal kry  
My hulp kom van die Here  
Die Skepper van die heelal

Die Skepper van die heelal



## **So is u liefde vir my**

Dieper as die oseane  
Wyer as die horison  
Hoër as pieke van berge  
Warmer nog as die son  
Kosbaarder as diamante  
Yweriger as 'n by  
Wyser as al die geleerdes  
So is u liefde vir my

Helderder as die sterre  
Soet soos die lag van 'n kind  
Veel sterker nog as orkane  
Mooier as 'n skat wat mens vind  
Lankmoediger nog as jou ouers  
Betroubaarder as die gety  
Groter as groot wêreldstede  
So is u liefde vir my

U lewe as prys aan die kruishout  
Gee U in liefde vir my

## As jy met trane saai

O hoor die nasies praat :  
Kyk wat het God gedoen  
Soos 'n droom het Hy Sion se lot versoen  
Hy't hulle vrygemaak van die slaweband  
En hulle teruggebring uit 'n vreemde land

Al loop jy en huil terwyl jy die saaisak dra  
Sal jy lag en sing as jy die oes inbring  
En as jy met trane saai  
in 'n land van die koningkryk  
Kom jy juigend terug  
Dra jy jou saad se vrug  
Al juigend agterna  
As jy die gerwe dra

Droë spruite wag in ons Suiderland  
Vir waterstrome uit God se hand  
O Here bring ons terug na u vrederyk  
Ons wil graag meer soos Jesus lyk

En al loop ons en huil  
terwyl ons die saaisak dra  
Sal ons lag en sing - as ons die oes inbring  
En as ons met trane saai  
in 'n land van die koningkryk  
Kom ons juigend terug  
Dra ons ons saad se vrug  
Al juigend agterna - As ons die gerwe dra

## **So groot wonder**

Ek sit alleen hier buite in die laatnag-uur  
Ek hoor slegs die geluide van die knetterende vuur  
Vanuit die sterreheemel kyk U op ons neer  
In die grote heelal ken U my o Heer

Ek dink aan verre lande in U groot meesterplan  
Daar is dit nou al môre - U weet daar alles van  
Daar bly miljoene mense van wie ek so min weet  
Dis regtig so groot wonder dat U my nooit vergeet

Ek kan dit nie verstaan nie  
Dit is te groot vir my  
Dat U na my omsien  
Dat U lief kan wees vir my

Daar is miljoene mense van wie ek so min weet  
Dis regtig so groot wonder dat U my nooit vergeet

Dis regtig so groot wonder ... dat U my nooit vergeet

## Onder u vleuels

Somtyds voel ek hartseer, alleen  
En koud as die nag oor my vou  
Maar U beskerm my - by U kan ek skuil  
In u hand sal U my veilig hou  
U is my Toevlug my Vesting my Rots  
My God op wie ek vertrou  
Here stuur engele om oor my te waak  
Bewaar my waar ek ookal gaan

Soms as ek struikel en val langs die pad  
Dan glo ek ek het verloor  
Maar omdat ek U liefhet sal U my red  
As ek roep dan sal U my hoor  
U is my Toevlug - my Vesting my Rots  
My God is altyd by my  
U stuur u engele om oor my te waak  
Oor u hulp sal ek my verbly

By U skuil ek  
U verhoor my gebed

'n Baie lang lewe gee U vir my  
Oor u hulp sal ek my verbly  
Oor u hulp sal ek my verbly

## **Laat my veilig in U bly**

Here Jesus – Rots vir my  
Laat my veilig in U bly  
Deur U lyding en U dood  
en U bloed gestort vir my  
Staan ek hier aan U verbind  
Vrygekoop – 'n Koningskind

Al my lofsange gesing  
Al die offers wat ek bring  
Kan my skuld tog nooit verhaal  
U moes red – U moes betaal  
Met leë hande – kom ek nou  
om aan die kruishout vas te hou

In my gees lê die hemel voor  
Ek hoor reeds die engelkoor  
En ek sien die hemeltroon  
en U glorieryke kroon  
God van liefde – Rots vir my  
Laat my veilig in U bly

En ek sien die hemeltroon  
en U glorieryke kroon  
God van liefde – Rots vir my  
Laat my veilig in U bly  
Laat my veilig in U bly

## **Kom Here Jesus kom (Oorwinningslied)**

Ek sien in my gees die glorie en die almag van die Heer  
Die Allerhoogste wat in liefde oor sy koninkryk regeer  
Hy't belowe aan die einde op die wolke kom Hy weer  
Hy is Koning Hy regeer

Loof Hom, prys Hom Halleluja  
Hy is Koning Hy regeer

Die Here is ons Vesting wat vir altyd sal bly staan  
Hy beskerm elke mens wat in geloof na Hom toe gaan  
Hy is ons Skuiling - Hy is ons Wapen  
Hy het die vyand reeds verslaan  
Hy is die Rots wat ewig staan

Loof Hom, prys Hom Halleluja  
Hy is die Rots wat ewig staan

Kom deel nou in ons loflied hef jou hande op na bo  
Blaas basuine slaan op dromme en kom dans voor God se oë  
Kom leef in die oorwinning van sy Woord waarin ons glo  
Want sy Woord sal ewig staan

Loof Hom, prys Hom Halleluja  
Sy Woord sal ewig staan

Ek glo dat Jesus Christus weer sy bruid gaan kom haal  
Ek glo die Vader het al reeds die dag en uur bepaal  
Ek sien al klaar die feestelike hemel-bruilofsaal  
En die tafel met ons bruilofsmaal

Die Gees en die bruid sê: Maranatha  
Kom Here Jesus kom